

Ysgrifennydd Cabinet yn agor ysgol newydd



Mae Ysgol Gynradd newydd Johnston wedi cael ei hagor yn swyddogol gan Ysgrifennydd y Cabinet dros Addysg, Kirsty Williams AC.

Mae'r ysgol - a agorodd ei drysau i'w disgyblion yn y Flwyddyn Newydd - yn ffrwyth llafur buddsoddiad o £6.4 miliwn mewn addysg yn y pentref.

Dyma'r drydedd ysgol i gael ei hadeiladu fel rhan o Gynllun Ysgolion yr 21ain Ganrif - cynllun ar y cyd rhwng Cyngor Sir Penfro a Llywodraeth Cymru sy'n rhannu'r ariannu.

Mae lle i 210 disgybl llawn amser yn ogystal â chyfleusterau meithrin a Chanolfan Adnoddau Dysgu i hyd at 20 o blant ag anghenion cymhleth neu anghenion ychwanegol.



Croesawyd Mrs Williams i'r ysgol gan Gadeirydd y Cyngor, Tony Brinsden, a'r Pennaeth, Gareth Thomas.

Dywedodd wrth y gwesteion fod yr ysgol yn brawf o beth all gael ei gyflawni pan fo awdurdodau lleol a Llywodraeth Cymru'n cydweithio ar Gynllun Ysgolion yr 21ain Ganrif.

Dywedodd Cadeirydd corff llywodraethu'r ysgol, y Cynghorydd Sir Ken Rowlands, ei fod yn "ecstatig" i fod yn yr agoriad, yn dilyn ymgyrch 14 mlynedd.

"Mae pethau positif yn digwydd wrth roi pobl cyn gwleidyddiaeth," ychwanegodd.

Ar ôl dadorchuddio plac, aeth yr Ysgrifennydd Cabinet am dro o gwmpas dosbarthiadau a chwrdd â disgyblion a staff dysgu.

Yn ogystal ag ystafelloedd dosbarth y babanod a'r adran iau, uned y blynyddoedd cynnar a'r Ganolfan Adnoddau Dysgu, mae ystafell dechnoleg, llyfrgell, ystafell blanhigion, neuadd a chegin.

Mae'r gofod tu allan yn cynnwys ardaloedd dysgu, cymdeithasu a chwarae ac ardal gemau aml-ddefnydd - ac mai rhai o'r cyfleusterau ar gael i'r gymuned ar ôl i'r ysgol gau.

Mae'r datblygiad hefyd yn cynnwys llwybr troed a man croesi sy'n cysylltu â'r llwybr troed presennol ar Heol Langford.

Cynlluniwyd yr ysgol gan dîm cynllunio'r Cyngor Sir, ac fe'i hadeiladwyd gan y contractwr o Hwlfordd, W. B. Griffiths a'i Fab.

Mae'r ysgol, sydd oddi ar Heol Langford, Johnston, yn cymryd lle'r hen adeilad ym Mharc Cranham.

Penawdau

Uchod

Kirsty Williams AC gyda disgyblion o'r Dosbarth Derbyn: Grace Morgan-Jones, Carwyn Morris, Billie Peace ac Alfie Phillpot. Gyda nhw mae Cadeirydd y Cyngor Tony Brinsden; Aelodau'r Cabinet Sue Perkins a David Lloyd; y Cynghorydd Rowlands; Dirprwy Arweinydd y Cyngor, Keith Lewis a'r Pennaeth, Gareth Thomas (ail o'r dde).

